

## Izoztutako soldatei jarriak



DANI BLANCO

### I

Inoiz dardarka jarri baziren  
smokin eta korbatak  
kimu berdeak datoz krisian  
kitto zenbaiten lo faltak.  
Ensaio asko kostatutako  
malko ta elkartasun plantak  
esku leunak ta patrika bero  
izoztutako soldatak.

### II

Kargu publiko, aholkulari  
eta zuzendari postu  
guztiak ere langile finak  
eta beharrezko kostu.  
Soldatek eta eguraldiak  
konbenioa adostu  
behean lurrundu egiten dira  
eta alturan izoztu.

### III

Elkartasuna goi alde hortan  
beti ibili da lerdan  
milaka milioi aurreztu, nonbait,  
erdia balitz bederen...  
Sarriren *lagun izoztua* lez  
ejenplo emanaz hemen  
bada ezpada, ez da esaten  
zenbatean izozten den.

### IV

Sindikalgintzan sinesten dut nik  
baina ez dakit zer esan  
hain sutsu ikusi ditudanean  
zenbait konturen defentsan.  
Askok denean, gutxi denean  
beti alde onera etzan...  
Zulo asko ta kiebrarik inoiz  
izaten ez den enpresan.

### V

Teilatupean txintxilik jarri  
ta beti gora begira  
goitik edanaz gizendu eta  
punta beheantza tira.  
Klima aldaketa etorriko al da?  
Nola, kontua hori da...  
Igual orduan goiko burruntzik  
tantoka urtuko dira.

### VI

Mundu honetan bizi gara ba  
eta haxe da garena  
izotzak izotz ta hormak horma  
krisi gorrian barrena.  
Izotzak ere badu lagun bat  
izotz beltza deitzen dena  
hain justu ere ikusi ez eta  
gehien erretzen duena.

**DOINUA:** "Kontatutzero noa kontuak".



Bidali zure sortak **bertsoak@argia.com** helbidera. Aukeratuak orri honetan argitaratuko ditugu.